

**Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisissaattut siunnersuummut**

ALLANNGUUTISSATUT SIUNNERSUUT

Inatsisartut Siulittaasoqarfianni amerlanerussuteqartunit Siumumeersunit, Inuit Ataqatigiinneersumit Atassummeersumillu pingajussaaneerinissamut saqqummiunneqartoq.

§ 1-imut

- 1.** § 1, imm. 1, oqaaseqatigiit siulliit ima oqaasertalerneqassapput:  
"Inatsisartuni ilaasortat akissaatit inissisimaffiat 35 malillugu aningaasarsianik tapisianik tamanut atuuttunik ilasanik, skalali malillugu tamanut atuuttunik tapisiaqanngitsunik immikkullu tapi-sianik kr. 49.340-inik ukiumut tunngaviusumik aningaasartalinnik, ukiumut aningaasarsiaqartinneqassapput."
- 2.** § 1, imm. 2 peerneqassaaq. Imm. 3-7 matuma kingorna imm. 2-6-ingussapput.
- 3.** § 1, imm. 4, imm. 3-nngortussaaq, ima oqaasertalerneqassaaq:  
"Aningaasarsiat tapisiallu imm. 1 aamma 2-mi taaneqartut qaammammut siumoortumik tunniunneqartassapput. Aningaasarsiat imm. 1-imi taaneqartut iluarsiivigineqartarnerisa AK-mut tunngasumi isumaqatigiinniartarnermi ineriartorneq malittaraat. Imm. 2 malillugu tapisiaq ukiumut ataasiarluni qaammatisiutit malillugit ukiorisap aallartinnerani nunatsinni akinut iluarsiiissut malillugu iluarsiivigineqartassaaq. Imm. 2 malillugu tapisiap iluarsiivigineqarnera siulleq 2004-mi pissaaq."
- 4.** § 1, imm. 5-imi, imm. 4-nngortussami, oqaaseqatigiit pingajuattut ilanngunneqassapput:  
"Najukkamiit najukkamut nuunnermi aningaasartuutit atorfilinnut (AK) maleruagassat atuuttut malillugit matussusiivigineqartassapput, imaalillugilli, Inatsisartuni ilaasortap atuuffini ukiunit pingasunit sivikinnerusumik isumagisimagaluarpaguluunniit nuunnermi aningaasartuutit matussusiivigineqassallutik."

### § 3-mut

**5.** § 3, imm. 4 peerneqassaaq, taarsiullugulu ilanngunneqassaaq:

*" Imm. 4. Inatsisartuni ilaasortat qaammatisiutit malillugit ukiut tamaasa aningaasanut killiliussat 50.000-inik amerlassusillit iluini Kalaallit Nunaanni paasisassarsiorlutik angalasinnaatitaapput, tak.-li imm. 5. aningaasat atunngitsuukkat ukiup naanerani atorunnaassapput.*

*Imm. 5. Inatsisartuni sinniisussaq piffissami killiligaanngitsumi Inatsisartuni ilaasortamut taartaasoq imm. 4 naapertorlugu Inatsisartuni ilaasortap pineqartup paasisassarsiorluni angalasinnaatitaanerani atuilissaaq. Qaammatisiutit malillugit ukiup naanerani aningaasat atunngitsuukkat atorunnaassapput. Inatsisartuni sinniisussap atuunna qammatisiutit malillugit ukioq naanngitsoq atorunnaarpat aningaasat atunngitsoorneqarsimasinnaasut Inatsisartuni ilaasortamut, sulinnigiffeqarnera qaangiuttumut, nuunneqassapput.*

*Imm. 6. Inatsisartut Siulittaasoqarfiat angalanissamut pilersaarussiaq tunngavigalugu siumoorutinik tunniussinissamut najoqqutassiussaaq kiisalu paasisassarsiorluni angalanermut atatillugu akiliutit utertinneqartarnerannut maleruagassiussalluni."*

Imm. 5 matuma kingorna imm. 7-inngussaaq.

### § 6-imut

**6.** § 6, imm. 1, oqaaseqatigiit siulliit ima oqaasertalerneqassapput:

*"Inatsisartut siulittaasuat, Naalakkersuisut siulittaasuat Naalakkersuisunilu ilaasortat aningaasarsiat § 1, imm. 1-imi taaneqartut saniatigut akissaatit inissisimaffiat 38 malillugu aningaasarsianik tapisianik tamanut atuuttunik ilasanik, skalali malillugu tamanut atuuttunik tapisiaqanngitsunik, aningaasarsiaqartinneqassapput."*

### § 12-imut

**7.** § 12 ima oqaasertalerneqassaaq:

*"§ 12. Inunnut, Inatsisartunut, Naalakkersuisunut il.il. ilaasortat aningaasarsiaqartitaanerat il.il. Inatsisartut inatsisaat nr. 11 28. oktober 1993-imeersoq imaluunniit Inatsisartunut, Naalakkersuisunut il.il. ilaasortat aningaasarsiaqartitaanerat il.il. Inatsisartut inatsisaat nr.17 7. december 2001-imeersoq naapertorlugu, soraarnerussutisiaqarsinnaalersunut §§ 13-16-imi maleruagassat malillugit soraarnerussutisiaqartitsisoqassaaq."*

### § 16

**8.** § 16, imm. 3-mi, "§ 15, imm. 1" "§15"-nngorlugu allanngortinneqassaaq.

## Kapitali 9-mut

9. Kapitali 9 peerneqassaaq. Kapitali 10 matuma kingorna kapitali 9-nngussaaq.

### § 21-imut

10. § 21.-imi, § 20-inngortussami, imm. 3 ima oqaasertalerneqassaaq:  
" *Imm. 3.* Taamaattorli Kalaallit Nunaata Landsråđianut aamma Kalaallit Nunaata Landstingianut sivisuumik ilaasortaasimasunut soraarnerussutisiaqartitsinermik aaqqissuussineq pillugu Landstingip inatsisaani nr. 3-mi ulloq 16. maj 1979-imeersumi ("Ataqqinaammik tunissutisisitsisarneq pillugu inatsit") aamma Landsstyremut il. il. ilaasortaasimasunut soraarnerussutisiaqartitsineq pillugu landstingip inatsisaani nr. 7-imi ulloq 14. juli 1982-imeersumi kiisalu Kalaallit Nunaanni Naalakkersuisunut, Landsråđimut, Inatsisartunut il.il. ilaasortaasimasut soraarnerussutisiaqartinneqarnerat pillugu Inatsisartut inatsisaat nr. 4 9. juni 1986-imeersoq maannakkut tunniuttakkat piginnaatitaaffiillu maannamutut angissuseqarlutik, maleruagassallu maannamut atuuttut malillugit, aalajangersakkat taakku malillugit piginnaatitaaffiit taakku atuukkunnaarnissaasa tungaanut, tunniunneqassapput."

## Nassuiaatit

Nr. 1-imut:

Naqqiineq taamaallaat pineqarpoq.

Nr. 2-mut:

Inatsisissatut siunnersuutip § 1, imm. 2-a, pisortani atorfinni atuuffinnilu katillugit isertitat inatsisartuni ilaasortaannermut aningaasarsiat aappaa qeqqanik qaangerpatigit Inatsisartuni ilaasortap aningaasarsiaasa ikilineqartarnissaannik aalajangersagaavoq.

Siunnersuutigineqarpoq aalajangersagaq peerneqassasoq. Inatsisartut Siulittaasoqarfiata inatsisissatut siunnersuummut tunngatillugu isumaliutissiissutaa innersuussutigineqarpoq.

Nr. 3-mut:

Allannguutissatut siunnersuutikkut inatsisip kalaallisut oqaasertai qallunaatut oqaasertaannut naapertuuttunngortinneqarput. Tamatuma peqatigisaanik nr. 2-mi allannguutip malitsigisaanik iluarsiiisoqarpoq.

Nr. 4-mut:

§ 1, imm. 5-ip kingunerissavaa, Inatsisartuni ilaasortanut erseqqinnerusumik aalajangikkamik inigisamik atugassiisoqartassamat. Inatsisartuni ilaasortat najukkamiit najukkamat nuunnerinut aningaasartuutit atorfilinnut (AK) maleruagassat atuuttut naapertorlugit matussuserneqartassasut siunnersuutigineqarpoq. Siunnersuutigineqarporli nuunnermi aningaasartuutini matussusiinermi Inatsisartuni ilaasortap pineqartup atuffimminik qanoq sivisutigisumik ingerlatsisimanera apeqqutaatinneqassanngitsoq.

Nr. 5-imut:

Inatsisartuni sinniisussaq Inatsisartuni ilaasortamut taartaalluni piffissamut sivisussusissaa aalajangigaanngitsumut ivertinneqarpat (ass. sivisuumik napparsimasoqarpat naalakkersuisuniluunniit ilaasortatut atuuttoqarpat) Inatsisartuni ilaasortap pineqartup paasisassarsiorluni angalasinnaaneranik atuilersinnaassasoq siunnersuutigineqarpoq.

Ilanngullugu siunnersuutigineqarpoq Inatsisartuni ilaasortap paasisassarsiorlu angalasarnerinut ukiumut aningaasanut killiliusseq 50.000 kr.-inut aalajangersarneqassasoq. Taamaalilluni inatsisissatut siunnersuummut sanilliullugu aningaasanut killissarititaq 20.000 kr.-inik qaffanneqarpoq. Inatsisartut Siulittaasoqarfiata inatsisissatut siunnersuummut tunngatillugu isumaliutisiissutaa innersuussutigineqarpoq.

Naalakkersuisut Siulittaasuata, Naalakkersuisuni ilaasortat sinnerisa kiisalu Inatsisartut Siulittaasuata aningaasarsiaasa ilaat, § 6, imm. 1-imi pineqartut, akissaatit inissisimaffiannut 36-imut, tapisianik tamanut atuuttuunik ilasatut, skalali malillugu tamanut atuuttunik tapisiaqanngitsutut aalajangersarneqassasut siunnersuutigineqarpoq. Inatsisissatut siunnersuummut tunngatillugu kr. 388.085-init kr. 358.501-inut ukiumut ikililerisoqarnissaa tamatuma kingunerissavaa. Inatsisartut Siulittaasoqarfiata inatsisissatut siunnersuummut tunngatillugu isumaliutisiissutaa innersuussutigineqarpoq.

Nr. 7-imut:

Naqqiineq taamaallaat pineqarpoq.

Nr. 8-imut:

Naqqiineq taamaallaat pineqarpoq.

Nr. 9-mut:

Nr. 2-mi allannguutip malitsigisaanik iluarsineq taamaallaat pineqarpoq.

Nr. 10-mut:

Naqqiineq taamaallaat pineqarpoq.